



1. december 2023

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

**Naalakkersuisunut apeqquteqaatit:**

- 1. Januar 2024 aallarnerfigalugu Royal Arctic Line kissaateqarsimanerattuut assartuinnermut akigititanut naafferartumik qaffakkiartuaartarnissaat suna tunngavigalugu Naalakkersuisut akuerisimavaat?**
- 2. Assartuinnermut akigititat qaffariaateqarnissaat avammut niuruteqarlutik inuussutissarsiuteqartunut kingunissaat suusinnaaneri Naalakkersuisut naatsorsuutigaat?**
- 3. Assartuinnermut akigititat qaffariaateqarnissaat nunatsinni niuertarfiutilinnut kingunissaat suusinnaaneri Naalakkersuisut naatsorsuutigaat?**
- 4. UKA 2022-mi Royal Arctic Line kisermaassilluni Kalaallit Nunaannut avammullu il. II. assartuussisarnerata atorunnaarsinneqassappat pitsaaqutit ajoqqutaasinnaasullu Naalakkersuisut misissuissasut piunaffigineqarput. Misissuisimaneq kingusinnerpaamik UPA 2024-mi Inatsisartunut tunioranneqassalluni. Matumani misissuineq sumut killippa?**
- 5. Naalakkersuisut suliamut tunngasunik paasissutissanik allanik paasissutissiisinnappat?**

(Inatsisartunut ilaasortaq Jens-Frederik Nielsen, Demokraatit)

### **Tunngavilersuut**

Royal Arctic Line assartuinnerannut akigititaatigut qaffariaateqarujussuarnerannut Naalakkersuisut akuersisimanerat Demokraatiniit paasisinnaanngilluinnarparput. Matumani innuttaasut akunneranni pisisinnaassuseq sulii apparsarneqaaqqiinnassaaq.

Qaffariaateqarnerit avannamut kujammukartunullu atuutsinneqassapput tamannalu innuttaasunut inuussutissarsionermullu pinngitsoorani kinguneqassaaq. Nunatsinni nioqqutissatigut suut tamarmik akitigut qaffariaateqarnissaat naatsorsuutigisariaqarparput. Matumnilu aamma eqqarsaatigineqassaaq Naalakkersuisut partiillu tunuliaqutsiisut (IA, Siumut, Naleraq aamma Atassut) 2024-mi ukiunilu tulluuttuni innuttaasut kaasarfianniit 85 million koruunit aassallugit aaliangereersimanerat.

Naalakkersuisut sunaqqissaaq akuerisimaneraat misissorluaraanni nutaarsiassaq nuanniitsuuvoq. Aaqqiisimanermi assartuinnermi akigititanik ukiut tamarluinnaqqissaasa qaffakkiartuinnaavinnissaanik imaqarpoq. Allatut oqaatigalugu Naalakkersuisut aaqqiissuussaasumik inuttaasut kaasarfianniit aningaasat naassaannngitsumik aallerfiginialerpaat.



1. januar 2024 6,4 procentimik qaffariaateqalereerput. Matumalu kingorna assartuinikkut akigititanik 2025-mi 3,1 procentimik aammalu 2026-mi 2,2 procentimik qaffariaateqartassalluni.

Tamatuma avataasigut siunissami, 2025 aallarnerfigalugu, ukiumut 2,5 procentimik akissaatitigut ataavartumik qaffaasoqartalissasoq. Tamanna qaffariaataasussat qulaani eqqaasatta qaavisigut ilineqassapput.

Apeqqutit ullut qulit suliffiusut iluanni akineqareersimanissaat kissaatigaara.